

## LORAMENDI-REN GORAZARREA BEDOÑA-N

Irailaren 20-an gorazarre aundi bat egin zitzaion Bedoña-ko bere jaiote-txean «Loramendi» euskal poetari. Jente asko ta asko bildu zan baserriaren aurreko landa luzean, milla batzuek. Leendabizi meza bat esan zan.

Bukatuta Loramendi zanaren amak estalita zegoan oroitarria agerian jarri zuten, eta bedeinkatu egin zan. Eta ostean jaialdia asi zan. Dantzariak leendabizi, Gero zenbait aurrek Loramendi-ren poesiak esan zituzten sariketan alde zurretik finkatu zan bezala. Arrue jaun euskaltzaiñak itz eder eta mamitsu batzuek esan zituen. Txistulariak. Basarri ta Lizaso bertsolariak. Eta azkeneko, sariak eman ziran, neskatiñla ta mutikoenak, eta bai gafiñerako literatura-sariak, Gernikako Arbola danak batera, an zeuden guztiak, ao batez kantaturik.

Eskerrak eman bear zaizkie sarietarako dirua eman zuten euskalzale ta entidadeai. Eta zertan esanik ere ez prestaerak egiten aritu ziranai, batez ere Bernabe Berecibar jaunari.

Gero bazkari bat izan zan. Eta bertan parte artu zuten: euskalzale, euskaltzain eta Arechavaleta ta Mondragoeko autoridade egintza guztien buruko egin zutenak. Euskeraren alde gogoa biztutzen ari dala dirudi.

## EIBARKO EUSKALZALEEN BILTZARRA ETA GIPUZKOAKO BERTSOLARIEN AZKEN TXAPELKETA NAGUSIA

Azaroaren 6, 7 eta 8-an Eibarrek euskalzaletasunezko egun ederrak bizi izan ditu. Euskaltzaindiak Irugarren Euskalzaleen Biltzarra egin du Ayuntamentuko gela dotore batean. Goizean goiz, ara eldutakoan, alkate jaunak agurrezko itz eder batzuek esan zituen eta asi ziran itzaldiak. Gai gorena Mogel eta literaturaren problema nagusiak zan. Itzaldi ederrak egin ziran eta nola urrengo **Euskera**-n argitaratuko diran eztegu ezer esango aietaz. Lendabiziko egunean, eguerdian, Garavilla-ren pintura erakusketa bat zabaldu zan Ayuntamentuko gela batean. Arratsaldean eta gabean Amaya teatroan euskal teatroa egin zan. Elgoibar-ko teatrugilleak ondo agertu zuten personajeen izate-moduai indarra ematen oso trebeak dirala. «Aitona ta Billoba» Garitaonandia-ren obra izan zan eman zutena. Artaz gafiñera Eibar-ko koralak euskal kanta batzuek eman zituen, oso ondo. Izan zan bakarriketa bat ere. Urrengo goizean bukatu zan Euskalzaleen Biltzarra, eta ordu batetan Club Deportivo-an arretratu-erakusketa bat zabaldu zan eta janari ta ardoa eskeifñi zien biltzarrerara joanekoai bertakoak. Arratsaldean aurren esamiñak egin ziran Ayuntamentu aurrean. Egun artan, alkatearen eskabidez, eskola ta kolejiotan jai izan zuten aurrak, esamifietara joan aal izan zitezen, eta plaza osoa aurrez beterik zegoan. Errezago egiteko mikrofonoaren aurretik pasatu ziran bana banaka parte artu nai zuten aur guziak eta kanta eta ipuin gozoak esan zituzten. Arratsalde ta gabean Amaya teatroan jaiia egin zan. Bilbotik joandako Gaztedi-ko dantzariak. Robles Aran-

guiz neba arrebak. Paulino Larrañaga eibartarrak bakarrizketa barregarri bat egin zuen Eibarko euskera jator batean, eta jentea atsegifnez baterik egon zan. Urrengo goizean Eibarko dantzari batzuek, Gaztedi-koak eta zenbait tokitako aurrekulariak parte artu zuten, eta aurrai sariak eman zitzaizkien, eta txistulariak konzertua eman zuten. Arratsaldean egin zan Gipuzkoako bertsolarien azken txapelketa nagusia. Zazpi bertsolarik parte artu zuten. Uztaipide, Lizaso, Michelena, Lasarte, Zepai, Aguirre (Aguinaga-n txapeldun gelditutakoa) eta Garmendia (Villafranca de Oria-n txapeldun gelditutakoa). Uztaipide-k irabazi zuen. Gipuzkoako Diputazioaren makilla eta iru milla peseta Gipuzkoako Ahorro-Kaxa-k emanak. Bigarren saria Michelena-k, Gipuzkako Ahorro Kaxa-k emandako kopa ederra eta bi milla peseta Eibarko Ayuntamentuarenak. Gaiñerako guziak seireun peseta bakoitzak Club Deportivoa-k emanak.

Amar millatik gora izan ziran entzuleak, eta, izan ere, adi adi egon ziran guziak denbora osoan eta ifñork ezuen alde egin zutik egonagatik.

Eibarko Ayuntamentuak erriko kale bati Mogel-en izena ematea erabaki zuen.

Norbert Tauer jaunak Praga-tik Euskalzaileen Biltzarrari agur laztan bat bialdu zion, baiña berandu eldu zan. Itzez itz jarriko dugu emen:

«EIBAR'ko URI-Batzar agurgarriaren ardurapean EUSKALTZAINDIK antolatutako EUSKALTZALEEN BILTZARRARI nere itzal aundiko diosala sutsua ta agurrik beroenak bialtzen dizkiot.

Garrantzi aundiko BILTZAR onek euskal-idazle ta jakintsu ospetsu MOGEL' en lan merezigarria euskaldunen begien aurrean ipifii, ta, euskaltzale aundi orren eredu, euskaldun zintzo guzien artean euskerarenganako maitasuna bizkortu nai du. Ez da naikoa aren oroimena gogoan gordetzea, baiñan bearbearrezkoa da berak erakutsitako bidean, euskeraren onerako, etengabe jarraitzea. MOGEL bezelako gizonak bear ditu EUSKALERRIAK oraingo egunetan ere.

Oraingo BILTZARRAK beste xede garrantzitsu bat lortu nai du: aurren artean euskerarenganako garra piztutzea. Orregatik euskeraz obeto itzegiten eta idazten dakiten umeentzako sariketa bat eratzen du. Gazterian datza euskeraren geroa: euskera salbatu nai ba-degu, ezinbestekoa da aurrei euskera irakastea.

Gipuzkoa'ko bertsolarien txapelketa nagusiak ederki osatzen du Biltzarraren programa. Ez da ukatzekoa, bertsolariak euskerazko bertsoen bidez onen-onenean agertzen dutela euskaltzaletasuna, eta ontan dago bertsolarien norgeiagoketen garrantzia.

Atzerrietan bizi geran euskaltzaleok estimu aundian daukagu Euskaltzaindiaren lan merezigarria eta euskeraren aldeko lan ontan ondorerik onenak opa dizkiogu.

GORA EUSKALERRIA, GORA EUSKERA».